


Un bunita storia skirbi pa Sr. Dolfi Kock:

Diadomingo proximo lo batiza e buki pa mucha: "E Gulido Golos"



ORANJESTAD (AAN): "E gulido golos" ta e nomber di e prome buki cu señor Dolfi Kock ta bay publica, y cual bautismo lo tuma lugar diadomingo awor, día 21 di November, pa l'or di atardi na Roseland Ballroom.

Famia Kock a prepara un programa di kita sombre, y señor Kock lo aprecia si tur persona invita lo yega un tiki prome cu ora, esta rond di 15 pa l'or di atardi. Lo tin actuacion di Diana Antonnette y di De Trupialen, cual nombrenan ta bisa tur cos...!

Manera ta conoci, señor Kock ta casa di e gran escritor di poesia, señora Belen Kock-Marchena.

No ta secreto cu actualmente e pareha aki cu pa hopi aña a traha riba tereno di enseñanza como maestro di school, ta gozando di nan pension, locual ta habri mas espacio pa nan dedica na, entre otro, skirbi.

Señor Kock a comenta cu aña pasa su señora a pidie p'e skirbi un storia bunita y na Papiamento pa mucha, pa nan presente durante e Festival di Buki 2004.

Como cu señor Kock tin un habilidad enorme y un costumber di skirbi "rima", na momento cu su señora a sugerí'e pa usa como tema e animalnan di Aruba, el a traha e cuenta den forma di rima, cu ta un tecnica dificil pa mayoria di hende cu gusta skirbi verso, pero cu si e tin e don di domina perfectamente.

"E storia ta bay riba e animalnan di Aruba cu ta biba feliz den nan habitat, pero a dreña un intruso cu ta causa hopi maldad...y manera e refran ta bisa 'un-ion ta haci forza' e storia ta

yega na un final feliz, unda cu e demas habitantenan di e mundo di animal cu ta protagoniza e storia, ta haya un solucion sin usa violencia".

DIARIO a repasa un ke otro parti di e obra y a keda encanta tanto cu e formulacion di e Papiamento, como e contenido y tambe e calidad di e buki y su presentacion. Elogio so nos tabata tin pa e autor cu a duna nos e honor di haci e entrevista cortico aki cune.

E buki ta ilustra pa nan yiu, Richie Kock, ken ta Abogado di profesion y ademá un bon pintor. E calidad di e buki manera nos a caba di menciona, ta excelente, y e ilustracionnan ta duna un toke elegante pero alavez moderno.

"E idea ta pa nos introduci e buki aki den enseñanza como cu Papiamento awor a bira Idioma Oficial, y e ta formando parti actualmente di e curriculum di school basico y tambe den e Ciclo Basico como material banda di Hulandes.

E buki aki ta pa grandi y chiquito, y comentarionan di escritornan cu nos a acerca pa lesa e manuscrito, ta hopi positivo, y nan a stimula nos pa publica e storia. Pa publica e buki aki a tuma un aña, pasobra e kaft ta diki, y aki na Aruba nan no por edita un buki asina, di manera cu e mester a worde imprimi na Hulanda. For di dialuna 22 di November por haya e buki na e librerianan local, y e prijs ta hopi razonable", señor Kock a duna di conoce.

DIARIO a puntra señor Kock si di awor pa dilanti e lo sigui skirbi buki, ya cu cabezantenan di school ta desea pa mas escritor local produci buki na Papiamento, y den entrevista cu Rector Kolfin recientemente, Papiamento e tambe a muestra su preocupacion na nos redaccion, cu tin falta di mas literatura na Papiamento ora cu nos Idioma a dreña den Ciclo Basico como vak. Señor Kock a contesta cu esey ta un pregunta cu e no por contesta aworaki, pasobra tur cos ta depende di e peticion cu e lo haya y di su

propio inspiracion.

"Tin hopi persona na Aruba cu tin manuscrito, pero e ayudo financiero y e sosten di e publico ta haci cu nan no ta publica", señor Kock a comenta, agregando cu na Aruba tin hopi literatura na Papiamento pero hopi hende no sa mes, pasobra ainda nos mes comunidad mes mester duna nos idioma e balor cu e merece.

GRADICIMENTO: "Mi kier gradici na prome lugar naturalmente, mi señora, mi yiunan y mi patrocinadornan cu esun mayor ta UNOCA, y tur otro persona cu di un of otro manera a haci posible pa e buki aki por worde publica, y mi ta spera cu e lo cay na agrado di e publico", señor Dolfi Kock a conclui.

DIARIO ta desea señor Dolfi Kock hopi éxito cu su prome buki, y nos si ta spera cu e lo sigui produci storianan na Papiamento pa nos muchanan, pa asina fomenta nos idioma mas ainda bao di nos comunidad, pasobra Papiamento, manera pareha Kock mes semper ta bisa, ta enberdad un dushi idioma!